

Yakobo

Yaižézé ac.

1 ¹Anutu zéma Miŋ Kewunina Yesu Kristo iorac welen qeŋe igira ni Yakobonéŋ Israelac hiçŋisai kisic 12 igucnec hahaya baec séc tuima kecaŋzu onac yaižézé ac énéžéŋua.

Ninžéŋ ninžéŋ zéma niŋtegic qinžtegic.

^{2a} Dacmuna héçna, ³ini imi ninžéŋ ninžéŋginawac manam batucnéŋ nanaŋ seli mihicŋi énéçmianzac imi ninzu imuac niŋac ^{2b}ini manam batuc hénia hénia hiçŋi énéçmiyu séc imuac me imuac niŋgic ségiséŋiyaguc wandacmac. ⁴Waigic imuac me imuac bisiqatéŋ kekecnéŋ wanžéŋu solaŋanima ic wažiwažiŋ wamma imuac me imuac ménda hocbésémaŋ. ⁵Onarunec méŋac méŋ niŋtegic qinžegicnéŋ séha ménda hemizaciguc, Anutu qesimiyu midacmac. Inéŋ qesimimiu séc ménda zéqetali énéçmima séçgina ogicma énéçmianzac. ^{6a}Ic mérénéŋ ewa éréhéç wanžazac imi konduŋ temboŋa luhucnéŋ qema mihilaŋgéyu yacma salalaŋgéanzac tanec wanžac. ⁷Imuac mia ic imuhuyanéŋ Miŋ Kewuninawac murunec iwawai méŋ memaŋ imuhuc ménda zéma nimmac. ⁸Ic imuhuya imi hénia imuac me imuac kemmac séc ewa éréhéç, qeka meka wanžazac. ^{6b}Imuac niŋ ewa éréhéç komocdia dac méŋ ménda wamma ninžéŋgéma zéweleçmimac.

Iwawai hemimia zéma ménda hemimia.

⁹Ninžéŋ ninžéŋ ic méŋ maqeqeya keczaciguc Kristoac qeriaiguc meyac mimiawac keczac imuac zézé ségiséŋi wammac. ¹⁰Wanju dacmuna méŋnéŋ hofi hinacyaguc kecaŋzaciguc zariŋ éséc bura tima qahac wammac imuac niŋac kekeç mamayawac niŋac Anutu nimmima zéhiaru mimac. ¹¹Kaiwe geric bélaŋagucnéŋ éréma qézézac qeyu séléçgéma zuria imi mayu imuac kiwiya hiabia imi birima qahac wanžazac. Ic hinac yanda ginaguc imi acguc aigina mema keŋkeŋa imuac suraiguc imuhucyanec séléçgéma qahac wandacmu.

Manam batuc zéma séwiac siŋ.

¹²Ic méŋ manam batuciguc naŋselima kecaŋzac imi mériaŋaguc wanžac. Meseliyu Miŋ Kewunéŋ niŋu séçgéyuguc kekeçac opoc

edamuyaguc Miŋ Kewunéŋ héŋsoroc waŋ énécmianzac ionac énécmiman zé ac zikima zéyec imi énécmiyu késamu. ¹³Waŋu ic méŋnéŋ manam batuc hicŋimiyu Anutunéŋ batucgénénzac imuhuc ménda zémac. Anutu imi birianéŋ batucgé mimacac séc qahac. Waŋu eŋeyaoc imi ic méŋac méŋ ménda batucgé mianzac. ¹⁴Waŋu ic méŋac méŋ manam batuc hicŋimianzac imi mia eŋeya siŋ birianéŋ hérémima kemma qatémianzac. ¹⁵Waŋu siŋ iminéŋ tackecma héri haima késpedes mihicŋianzac. Waŋu késpedes iminéŋ yandima héri haima humuc mihicŋianzac.

¹⁶Dacmuna soroc hécna, galeŋ megic ikoc waŋ énécmiwac niŋac. ¹⁷Ewa hiawac buŋa hiabia méŋnéŋ méŋ zéma sese solaŋa méŋnéŋ méŋ imi moczoŋ ounec Maŋgoc asac mararaŋaguc iwac murunec mama haanzac. Iwac muru imi ménzé ménzé haka me ireha meleŋqeleŋa méŋ ménda hezac. ¹⁸Iwawai inéŋ zéyu hicŋima keczu imuac suginaiguc neŋaŋ imi héla gocmia walac walac wambiŋ niŋac eŋeya ewa siŋ méndacma ackuažéc hélanéŋ héri haima mihicŋi nénécmiyec.

Gezacnéŋ niniŋa zéma niŋ tohotohoya.

¹⁹Dacmuna soroc hécna, ini yomuhuc nimmu. Ic méŋnéŋ méŋ focdac gezac haima nimmac, néŋ ac bakia imi focdac ménda melemmac. Waŋu niŋu biriŋu qeria focdac ménda yacmac. ²⁰Qeri biricnéŋ kekec solaŋ dindiŋa Anutunéŋ niŋu sécgéanzac imi ménda mihicŋimac. ²¹Imuac bec, niniŋ qakola zéma kaižiliweŋ haka imi moczoŋ hetecgé gilidacma, qeri uŋagina aŋgéŋ tiénécmimiawac kuha, qeri ginaiguc bec himic énécmiyu hezac ackuažéc imi goiya héima aŋgéŋ tima héwiŋa héimu.

²²Ini ackuažéc imi eŋdac gezacŋinanéŋ sac nimma ikoc ménda waŋamumu, néŋ niŋtohoma moczoŋ wandacmu. ²³Ic méŋnéŋ méŋ ackuažéc imi gezacnéŋ sac nimma ménda wamma memac imi ic méŋnéŋ eŋeya séwiac kic ségéraya wikiŋiguc aŋanzac ésécnec wanzac. ²⁴Eŋeya aŋaŋu tecgéyu keŋkecma kic tanera dimuhucya imi focdac eluŋ qeanzac. ²⁵Néŋ ic méŋ héna ac solaŋa késpedes igucnec hulac énécmianzac imi hémma héŋgésima ménda eluŋ qeyu wammanec kecmac imi wawaŋ memeya séc héla mériaŋ mihicŋimac.

²⁶Méŋnéŋ méŋ eŋeya niŋac niŋu Anutu ee héihéi wammimia tanec waŋuguc kileŋ ezelaŋa galeŋ ménda mema eŋeya ewa qeriya ikoc waŋamumaciguc imi iwac ee héihéi waŋmimiawac haka iminéŋ eŋomia wammac. ²⁷Anutu Maŋgocnéŋ niŋu buŋa suruc hiabia imuac ai lalaclalac solaŋ qeŋeya waŋanzac imi mia embac maléya zéma merac gupaŋa inicgaleŋ waŋ énécmima baecac wawaŋ meme biria igucnec gésiamuma gocya qahac kekec imi mia.

Haka bakésasacnec ménda wammu.

2 ¹Dacmuna hécna, Miŋ Kewunina Yesu Kristo edamuyaguc i ninzéŋ géanzuiguc imi ic méŋac méŋ bakésasaciguc ménda énépésimu.

²Onac tocgotocgo amaiguc ic méj méria merawaiguc binenj golinén memeya haiyu hiŋgaru owo maleku héŋsoroc sorocgia hima éréyu duŋa ic maqeqeya méj owo malekuya qakolayaguc hama érémaciguc ³ini ic owo maleku héŋsoroc sorocgia hima érézac iwac muru lilingé hémma you hama tatac hiabia yomuaru tacna zéma ic maqeqeya iwac niŋac zéma gi hia imuaru nanna me hénanaiguc mama tacna zémuiguc imi ⁴ini niŋgic, eŋaŋ eŋaocnec héŋgési waŋamuma ninij birianén niŋgésima gésigési icya séciguc kecanzu tanec ménda wanzac me?

⁵Dacmuna soroc hécna zéwa niŋgic, Anutunénj baec yomuaru ic maqeqeya gésima énépésima ninzénj ninzénjgina meyandi énécmima i siŋ nimmianzu ionac mia iwac héŋgaleŋ ama areŋa yanda ara zikima buŋa qeénécmiyec imi mératéc énécmiyu késagic. ⁶Nénj ini imi néwécgeŋa ic maqeqeya mema titi waŋ énécmianzu. Waŋu méré méré eneŋ yéwéri mihicŋj énécmima aciguc onopocanzu me? Imi mia ic hinac soukiwaginaguc. ⁷Waŋu onac unuruma Kristoac tohotoho ichéra zéanzu qacgina eebipiyaguc imi ic soukiwaginaguc ieneŋ zébiri qébiri ménda waŋanzu me? ⁸Ini imi kiwi téréyaiguc hezac séc gi geŋa niŋac goi héihéi waŋamuanzanj éséc alagawac imuhuyanec wammiwésémaŋ zéyec héna ac eŋeŋa imi niŋtoho waŋanzuiguc imi hia wanzu, ⁹nénj ini goi héihéi imi bakésasaciguc soukiwa ic ionacnec waŋ énécmianzuiguc imi késpedes waŋkeczu. Imuhuc waŋgic héna acnéŋ késpedes ic zéma zétecgé énécmimac. ¹⁰Méŋnéŋ méj héna ac moczoŋ niŋtoho wamma kecma momacguc ménda tohoma qonzoŋtoŋ gémac imi, héna ac moczoŋ yanda logizac wanzac. ¹¹Imi mia kaisero ménda wambésémaŋ zéyec inéŋnec mia icac kecec humuiguc ménda opocbésémaŋ zéyec. Imuac bec kaisero ménda wamma icac kecec méj humuciguc opoczanjiguc gi bec héna ac imi logizanj wanzac. ¹²Ini imi nalé ménda sosoliyu hulac énécmimac niŋac énécmiyec héna ac qelia imuaru namma gési énécmimacac hezac. Imuac héna ac qelia imuac séciguc namma acgina zéma hakagina wammu. ¹³Wésé ninij qahac hakagina waŋanzu ionac imi wésé ninij qahac zégési énécmimac. Wésé ninij iminénj zégésigési imi ogicma eŋeŋa wanzac.

Ninzénj ninzénj wawaŋ memeya qahac imi humumia.

¹⁴Dacmuna hécna ic méŋnéŋ ni ninzénj ninzénjaguc keczua zémaguc wawaŋ memeya qahac kecmaciguc imi iwac muru némac hiabia méj hicŋnimimac? Ninzénj ninzénj imuhuyanénj eŋeya hia mehiaru mimacac séc wanzac me? ¹⁵Ic me embac dacmunagina méŋnéŋ séwi usuya zéma nene iwawaiya qahac kecanzaciguc ¹⁶Onarunec méŋnéŋ kuanec sac ézéma ala, bénzénj nec hama kenna; Kemma geric zonimma nene nena sécgé géŋju. Imuhuc ézéma séwiac iwawai méj ménda mimaciguc, ac iminénj némaciguc méra mimac? ¹⁷Tanec imuhuyanec, wawaŋ memeyanéŋ ménda hemiyu ninzénj ninzénj eŋeya imi humumia wanzac.

¹⁸Waŋu méné yomuhuc hia zémacac séc; Gi ninzén ninzénaguc, waŋu ni wawaŋ memenaguc, imuac ninzén ninzénaga wawaŋ memeya qahac imi nézéna hémma ni wawaŋ memenaiguc ninzén ninzénna gézéwa hémma. ¹⁹Gi Anutu momacguc keczac imi ninzénngéanzaŋ. Imi hia wanzaŋ. Uŋa biria acguc iwac ninzénngéma zénéngina hiriyu kecanzu. ²⁰Oh, ic watalaŋa gi, ninzén ninzén wawaŋ memeya qahac imi gorosona wanzac imi niŋasarimaŋ zé waŋgénzac me? ²¹Neŋaŋ esaŋ ambécna Abarahamnén naja Isaka zaki téréya qahaiguc haimiyec. Nalé imuaru Anutunén ic solaŋa zémiyec. Gi ninna imi wawaŋ memeya niŋac qahac tanec wanzac me? ²²Oloŋ ninzaŋ ésécnec ninzén ninzén iminén iwac wawaŋ memeyaguc momacnec aiya meyc wawaŋ memeya néŋnec ninzén ninzénna imi solaŋaniyec. ²³Imuac kiwi téréya méniguc yomuhuc zézac imi hélaguc waŋec, Abarahamnén Anutu ninzénngé miyu haka imuac mia niŋu solaŋa waŋec. Waŋu ic imi Anutuac alaya zémimia waŋec. ²⁴Imi hénni, ic ménénén ninzén ninzénanec qahac, néŋ wawaŋ memeyaguc niŋac wamma ic solaŋa zémimia wanzac. ²⁵Waŋu imuhucyanec héna yanda embac Rahap imi kicgaleŋ ic méli énécmigic^a keŋgic imi unuruma héna ménunec méli énécmiyu keŋgic wawaŋ meme imuac mia solaŋa zémiyec. ²⁶Séwi qeri uŋaya qahac hezac imi séwi humumia, imuhucyanec ninzén ninzén wawaŋ memeya qahac imi humumia.

Ezelaŋgina galeŋgému.

3 ¹Dacmuna hécna, ini kiwi ic wamma kecziŋ neŋaŋ késpedesicninawac kitiwa réwéria mihicŋiwiŋac hezac imi niŋasarima kiwi ic sécnina ménda ogicma wambiŋ. ²Neŋaŋ moczoŋ yanda iwawai sasalaiguc qonzoŋtoŋ géma mama nunuanzac. Imuac ic mén ackuazécyaguc késpedesira mén ménda hezaciguc ic imi solaŋ dindiŋa. Ic imuhuyanén séwiya moczoŋ yanda pinzuŋa hai amuma dindiŋanec kecmacac séc wanzac. ³Neŋaŋ becosic eneŋ acnina tohomu niŋac kuaginaiguc pinzuŋ haima séwigina moczoŋ hérékeŋ héréha waŋ énécmianziŋ. ⁴Waŋu konduniguc zéic héŋgic. Zéic imi kuneŋ yanda, waŋu luhuc selianén mihilaŋgéyu keŋanzac, néŋ qindi qindiŋiya komocdia dac imi haima nesinesi icyawac ewa siŋ hezac séc nesima keŋha waŋanzac. ⁵Imuhucyanec ezelaŋ imi séwi ninawac kitiwa komodia mén, waŋu wawaŋ meme kuneŋ yandawac tétéc qeqe ac zéanzac.

Héŋgic, geric lokoc komocdia dac ménénén zéléŋ baec yanda zeric qericdacma keŋanzac imi hémma nimmu. ⁶Ezelaŋnina imi geric lokora, biriayanén séwiya moczoŋ mesécgé mima eŋeya buŋa késayu séwiya imi iwac baec kurumeŋa wandaczac. Séwininawac kitiwa sasala sugcinaiguc

^a 2:25 Girik aciguc; kua meme ic.

inén séwinina moczor yanda mebirima karisi hénia ésécnec lelecgéma kemma hicñisaiya hicñisaiya zeric qeric wañ énécmianzac. Wañu zeric qericac kuha imi geric siawac bélaña igucnec haanzac. ⁷Yañqesi hénia hénia zéma nei zuku hénia hénia zéma zinimokoleñ hénia hénia zéma konduj qeriaiguc iwawai kekec ginaguc hedaczu imi icnéñ mebélacgé énécmigic ionac nininēnec méndac énécmianzu, néñ ⁸ezelañnina imi ic méñnéñ méñ mebélac gémacac séc qahac wanzac. Imi biria ménda sima aiya meanzac. Wañu iwac muru imi kumiñ humuc mihicñi nénécmimianén sécgéma hezac. ⁹Ezelañ iminénēnec neñañ Miñ Kewu mañgocnina mepésimima legicya héima iminénēnec acguc ic tosara Anutu eñeya tanera méndacma meénécmimia imi saecgé énécmianziñ. ¹⁰Kua imi momacguc, néñ imuarunec mozoc ac zéma saec ac momacnec maanzac. Dacmuna hécna haka imi nimba ménda sécgézac. ¹¹Doku kiwa momacgucnéñ doku saola zéma howuc howura momacnec mihicñi nénécmimac me? ¹²Dacmuna hécna, ini niñgic fik icac uranéñ oliwa gocmia hia haimac? Wañu waiñ icac uranéñ fik gocmia hia haimac? Qahacgucnec!, imuhucyanec doku howec yagucnéñ doku saula mihicñi nénécmimacac séc qahac.

Niñtegic qin̄tegic ou kurumēñ igucnec hahaya.

¹³Onarunec mérénéñ niñtegic qin̄tegic zéma niniña asacasaria keczac? Inén haka hiabia wamma gum bénzénzēña niñtegic qin̄tegicya igucnec hahaya iminénēnec wawañ memeya imi menénécmiyu hémbiñ. ¹⁴Wañu onac ewa qeriginaiguc nimbupuc howuc kétin̄kétin̄ña zéma féñgéc hakanén héwiwiñ gézaciguc ackuazéc héla qema tétéc qeqe zéma ikoc ménda wammu. ¹⁵Niñtegic qin̄tegic imuhuya imi kurumēñ igucnec ménda maanzac, néñ baec igucnec zéma ic séwi siñ igucnec zéma Biria miñinawac murunec haanzac. ¹⁶Hénia yomuhuc niñac mia imuhuc zézu; Nimbupuc zéma hémbaoc hezac imuaru hazéc zéma haka biria hénia hénia hezac. ¹⁷Nén niñtegic qin̄tegic kurumēñ igucnec hahaya imi walac ewa qeri météréya zéma luae, gum bénzénzēñ, niñtoho, wéséniniñ zéma héla gocmia hiabia sasala mihicñima bakésasac qahac, kiciguc welen̄ qeqe qahac, imuhucya. ¹⁸Luae qeqe icnéñ luae qesama kekec solañawac héla mihicñianzac.

Baecac ala siñ.

4 ¹Sucginaiguc euqac zéma tualefic imi dimuacnec haanzac? Imi mia séwi taséhécgina sugcinaiguc tosara euqac wawañawac siñginaguc keczu ionac murunec haanzac. ²Ewa siñ kuneiñ yanda wañénéc mianzac, néñ ménda mihicñizu. Unu humu wañamuma nimbupuc wañanzu, néñ hia mihicñimuac séc qahac wanzac. Imuac mia ini euma hazéc ac wañamuzu. Wañu hénia héla imi zéwelecgina qahac kecanzu imuac niñac

ménda mihicji keczu. ³ Waŋu zéwelecmima kileŋ ménda mihicji zuiguc imi eŋaŋ siŋginawac menec qenec wammu niŋac sigima zéwelecgic. ⁴ Kaiseroac ic embacya ini, baecac iwawaiyaguc ala wamma kekec imi Anutuac hažéchéra wamma kekec wanžac imi ménda niŋacgézu? Imuac ic méréneŋ baec ala wammimaŋ zé ewa ewa waŋanžac imi eŋeyaoc Anutuac hažéra wawaŋa wanžac. ⁵ Ini kiwi téréyaiguc Anutunéŋ Uŋa Téréya méli nénécmiyu ewa qerininaiguc kecaŋzac Uŋa Téréya iminéŋ mia nimbupuc wammacac séc waŋ énécmianžac zéyec,^b néŋ ini imi ac imuac niŋgic eŋomia wanžac me? ⁶ Waŋu imi sac qahac, néŋ inéŋ ewa hiawac buŋa kuneŋ yanda nénécmianžac. Imuac yomuhuc zéyec; Anutunéŋ tétéc qeŋe ic nesi énécmiyu keŋgic ewa qerigina memaamuma keczu ionac mia ewa hia waŋ énécmianžac. ⁷ Imuac ini Anutu niŋtoho wammimu. Imuhuc wamma Biria miŋina hažéc wammimu. Imuhuc wammigic qizizigé énécmimac. ⁸ Anutu hosucgé migic, imuhuc waŋgic i acguc hosucgé énécmimac. Biria meme ic ini méragina zuacgic lalaclalac wammac. Ewa qerigina keŋhéi hahéi waŋanžac ini ewa qerigina métérégic lalaclalac wammac. ⁹ Qerinéŋ yai wisisigaguc zésiac wamma ewa biric wammu. Zédesigina melenigic zésiaciguc, zézé ségiségigina melenigic niŋ yéwériiguc kemmac. ¹⁰ Miŋ Kewuac kiwaiguc memaamumu, inéŋ meeŋ énécmimac.

**Ic tosara ménda niŋgési
énécmimu.**

¹¹ Dacmuna hécna, zébiri qébiri ménda waŋamumu. Méréneŋ mén dacmunaya zébiri mizac me gésimizac imi héna ac zébirima gésizac wanžac. Héna ac gési keczaŋiguc gi héna ac tohotoho ic qahac, néŋ gésigési ic keczaŋ. ¹² Héna ac miŋina zéma gésigési ic imi momacguc sac keczac. Inéŋ mia bénzéŋ aŋgéŋ tiénécmimac me bénzéŋ mebirí énécmimacac séc. Néŋ gi méré icnéŋ alahécgina gési énécmianžac.

Oraŋgucac niŋkumuma tétéc qeŋe wammuc ménda hezac.

¹³ Zéwa niŋgic, sugina igucnec tosara erac me oraŋ nini tauŋ imuaru me imuaru kemma soukiwa ai mema kosia mema kecni yawuŋ mén tecgéyu hawiŋ. Imuhuc zéaŋzu ini ac yomi nimbésémaŋ; ¹⁴ Oraŋguc némacnéŋ hicŋi énécmimac imi ini ménda niŋzu. Kekecgina imi némac iwawai? Ini imi baec wéséséya nalé hotoŋa dac kecma aocgéaŋzac imuhucya. ¹⁵ Imuac ini néwécgeŋa yomuhuc zémuac hezac, Miŋ Kewuninanéŋ niŋu sécgéyu nini kecma ai imi mewiŋ. ¹⁶ Ini deguc tétéc qeŋe ac eŋomia wamma séwi eŋeŋ waŋzu. Waŋu tétéc qeŋe ac imuhucya

^b 4:5 Tosara imi yomuhuc melemma ogic hezac; Anutunéŋ qerininaiguc uŋanina hai nénémiyu hezac imuac héŋgaleŋ wammianžac.

imi moczoŋ biria wanʒac. ¹⁷Imuac mia ic mérénéŋ wawaŋ meme hiabia wawaŋawac séc niŋtegic qiŋtegicya hemiyuguc kileŋ ménda waŋu késpedesicya wanʒac.

Ic soukiwaginaguc ionac goro ac.

5 ¹Hinac zéma soukiwa yandaguc keczu ini gezac haima niŋgic. Zéra waiya hiçŋi énécmimacac hezac imuac nimma qac siac wammu. ²Hinac mériaŋgina imi houdaru owo malekugina imi qakolanéŋ qedacʒac. ³Goli siliwaginanéŋ hufeŋaguc wandacʒac. Waŋu hufeŋa iminéŋ geric ésécnec séwi busugina nema héniagina zéaumac. Ini imi nalé tetecgiaiguc hinacgina qauqau haigic enzac. ⁴Ninzu, ai ic tosara onac aiginaiguc héla tocgogic imuac ai boŋagina aŋgétima ménda énécmigic ai boŋa iminéŋ qacʒac. Waŋu tocgotocgo ai megic ieneŋ siacgic Miŋ Kewunina, Miŋ Kewu Pupunda iwac gezawaiguc hiŋgacʒac. ⁵Ini baeciguc hémbaoc wamma iwawai hiabianéŋ mezeric amuma kecma unu hézéŋ hézéŋgiawac naléyaiguc ewa qerigina halécya dépaŋ yanda waŋu keczu. ⁶Waŋu ini ic solaŋa imuac mia késpedesicyaguc zéma zétécgéma qehumugic. Waŋu inéŋ musuqeŋ ac méŋ ménda meleŋ énécmiyec.

Qeŋzeŋ manzeŋiguc naŋselimu.

⁷Imuac dacmuna hécna, ini nalé horugiyu naŋselimanec kecgc Miŋ Kewunina harémac. Himicnec qimicnecac icyanéŋ héla gocmia baec igucnec hiçŋianʒac imuac mambéc kecma niŋselima kia naléya zéma kaiwe naléyawac^c mambéc kecaŋzu. ⁸Ini acguc ewa qerigina niŋseligima nalé horua naŋselima kecmu. Miŋ Kewuninawac hahayawac nalé imi ducŋʒac. ⁹Eŋaocnec diric doroc ac ménda waŋamumu, ac imi tohoma kecgc gésigésiac zéranéŋ qiziziŋgé énécmima kemmac. Ninzu gésigési icnéŋ hosucgé énécmima naguiguc séŋgaŋgeŋ nanzu. ¹⁰Dacmuna hécna, kua meme ic Miŋ Kewuninawac qaraiguc zégic i inicgic zérabéra zéma mambéc kekec horua imuac sésécgina wammu. ¹¹Ninzu naŋselima kecaŋzu ionac nimma mériaŋ ginaguc zéaŋziŋ. Ini Yop ac nanaŋ seli imi gezac ginanéŋ niŋgic. Waŋu Miŋ Kewuninanéŋ tetecgiaiguc dimuhuc wammiyec imi oloŋnindaczu. Miŋ Kewunina imi méŋac méŋ ogicma ewa biric zéma wésé niniŋ kuneŋ yanda waŋ nénécmianʒac.

¹²Dacmuna hécna, ac méŋ méndagucnec zéselimu. Ac imuac niŋgic ac tosara onogicma réwéria wammac. Kurumeŋac qaraiguc me baecac qaraiguc iwawai tosara méŋac qaraiguc koroma ménda zéselimu. Niŋgic oaec waŋu oaec zému, waŋu qahac waŋu qahac zému. Imuhuc ménda waŋgic, késpedesic ginaguc zéénécmiwac niŋac.

^c 5:7 Girik aciguc; Kia walaha zéma kia tetecgia.

Ninzéngéma zéwelecmu.

¹³Onarunec méhnéh yéwéri mihicizaciguc imi Anutu zéwelec wammimac. Méhnéh méh ségiségiiguc keczaciguc imi mepé qepésiac legic héimimac. ¹⁴Onac murunec méh hafi zepayaguc keczaciguc imi hénaroh ionac qeriac galeh unuruyu hama Mih Kewuninawac qaraiguc halécnéh naec mima zéwelecmu. ¹⁵Zéwelecgina ninzéh ninzéhginaiguc wawaŋa imi hafi ic mehiaru énécmimac. Mih Kewuninanéh hafiya igucnec meyacmimac. Waŋu késpedesic méh waŋeciguc imi acguc waimimac. ¹⁶Imuac bec késpedesicgina zézuac waŋamuma hafigina hiarumac niŋac nangé amuma zéwelec wammu. Ic solanjanéh zéweleru kuhaguc zéma hélaguc waŋanzac. ¹⁷Elia imi héniaya ic omaya neŋaŋ ésécnec, néh inéh kia ménda hamac niŋac solanjanec weleru yawuŋ haréwéc zéma maso 6 imuac séc baeciguc kia ménda mayec. ¹⁸Waŋu muŋguc weleru kurumeŋnéh kia haiyu mayu baecnéh héla mihicŋiyec.

¹⁹Dacmuna hécna, onarunec méhnéh ackuazéc héla waima rouc keru ic méhnéh nangémiyu lilingéma hamaciguc imi ²⁰nangémiyec inéh lilingéma hayec iwac qeri uŋa imi humuc igucnec aŋgéŋa tima késpedesicya sasala osodaczac. Ini hénia imi niŋtegiomu.